



## VEDTEKTER FOR VIKEDAL BYGDAHUS SA, VINDAFJORD KOMMUNE

Vedtatt av Årsmøte 14.02.13.

### §1 Namn og Selskapsform

Vikedal Bygdahus SA er eit samvirkeføretak med vekslande medlemstal, vekslande kapital og avgrensa ansvar.

### §2 Føremål

Føremålet med laget er å reisa og driva eit bygdehus for på den måten å skaffa innbyggjarane på staden ein høveleg samlingsstad med rom for møter, festar, kino, teaterframsyningar, konsertar, studierom , idrettslokale. m.m.  
Samvirket har ikkje til formål å gi medlemmene økonomisk gevinst.

### §3 Bruk av huset

Bygdahuset skal stå ope for alle lovlege føremål. Ingen må stengjast ute på grunn av religiøse, sosiale eller politiske syn. Huset vert elles disponert slik som styringsorgana i samvirket finn det føremålstenleg. Det skal takast omsyn til den økonomiske situasjonen til kvar tid, og til sosiale og kulturelle føremål som huset skal gje plass til.  
Leigevilkåra skal være dei same for alle som nyttar huset, anten dei er andelseigarar eller ikkje. Dei organisasjonane som har flest andelar i huset, og dei som har gjort mest for å få det reist, kan likevel ha ein viss førerrett når det gjeld leige av lokalet.  
Dersom det vert usemje om bruken av bygdahuset, skal saka avgjerast av kommunestyret eller den som kommunestyret gjev fullmakt til.

### §4 Andelane

Andelar i laget kan teiknast av organisasjonar, lag og institusjonar i form av kontantinnskot, naturalia eller dugnadsarbeid. Kvar andel er 1000 kr.  
Andelseigarane har ikkje ansvar for laget sine plikter utover andelane som er teikna.  
Det skal førast særskild protokoll over andelseigarar og talet på andelane deira. Andelane skal ikkje forrentast.

Meir enn 50 % av andelane skal til ei kvar tid vere eigd av idrettslag/organisasjonsledd i Norges idrettsforbund og olympiske og paralympiske organisasjonskomite og/eller kommunar/fylkeskommunar. Det skal ikkje betalast medlemskontingent.

Fordeling av andelar samt namn på representantar vert protokollført i årsmøtereferatet.

### §5 Overdraging av andelar

Det er ikkje høve til å overdra andelar til andre utan at styret for samvirket samtykkjer.  
Overføring av andelar skal styret nekta dersom det ligg føre sakleg grunn eller overføringa vil medføre brot på føresegner i vedtektene.  
Andelane skal ikkje betalast tilbake ved utmelding.



## §6 Styringsorgan

Andelslaget har desse styringsorgana:

Årsmøte, samansett av representantar for andelseigarane.

Styret, vald av Årsmøtet.

## §7 Årsmøtet

Årsmøtet er samvirket sitt øverste organ. Det vert halde innan utgangen av februar og har til vanlig føre:

1. Årsmelding og reknskap
2. Framlegg til budsjett for komande år.
3. Val av leiar for komande år.
4. Val av styremedlemmer, nestleiar og kassestyrar.
5. Val av revisorar
6. Andre saker som står på saklista

Til å førebu valet på neste årsmøte vart det vald ei valnemnd på 3 medlemmer fra andelseigarane. Fleirtalet i nemnda skal vere fra idrettslag/ organisasjonar, jfr §4. Leiaren i styret for samvirket kallar inn til Årsmøtet, som skal kunngjerast gjennom lokalpressa, ved brev eller oppslag. Innkalling med førebels sakliste skal gjerast kjent minst ein månad før møtet skal haldast. Framlegg som nokon måtte ynskja å få handsama på møtet, må vere send til leiaren minst 14 dagar i førevegen. Endeleg sakliste skal sendast ut ei veke før møtet vert halde.

Årsmøtet er vedtaksført når minst 2/3 av representantane er tilstades. Det kan ikkje gjerast vedtak i andre saker enn dei som står på saklista. Eit av andelslaga kan ikkje åleine utgjere fleirtal i ei avgjersle.

Dei som sit i styret i Vikedal Bygdahus skal representere og stemme for sine respektive lag på årsmøtet.

Årsmøtet vel to som skal skrive under møteboka som skal sendast til andelseigarane etter møta.

Dei andelseigarane som ikkje er representerte på Årsmøtet, er bundne av dei vedtaka som vert gjorde.

## §8 Stemmerett ved Årsmøtet

På Årsmøtet stiller representantar for andelseigarane. Kvar representant har ein stemme. Antall representantar frå dei ulike andelseigarane skal stå i høve til omsetninga andelseigaren har med foretaket.



## **§9 Halvårsmøte**

Halvårsmøte i samvirket skal heldast innan utgang av september. På møtet skal ein ha føre rekneskapsoversyn pr. 1. juli, og andre saker som står på saklista.

## **§10 Ekstraordinært årsmøte**

Ekstraordinært årsmøte kan kallast inn til av styret, eller når andelseigarane som representerer minst 1/3 av andelane krev det.

Ekstraordinært årsmøte kan berre ha føre saker som er sette opp på saklista for dette møtet.

## **§11 Styret**

Styret i samvirket skal ha maks 8 - og minst 5 medlemmer med varamenn, pluss ein frå kommunestyret utan røysterett med varamann. Nye medlemmer til styret skal veljast for 2 år. Ein skal ikkje skifte ut heile styret samtidig, men syte for at halve styret vert fornya kvart år.

Styreleiar, nestleiar og kassestyrar vert valde av årsmøte. Skrivar vert vald av og innan styret. Styret kan ta avgjerd i saker når meir enn halvparten av styremedlemmene er tilstades, mellom dei leiaren eller nestleiaren. Ved like røystetal vert saka utsett.

Styret skal setja i verk vedtaka i samvirket og tek elles dei avgjerder som drifta av Bygdahuset krev.

Styret har ikkje høve til å selja, pantsette eller på annan måte hefta laget sine faste eigedomar. Styret kan heller ikkje gjera avtale om kausjonsplikter av noko slag, eller bruka laget sine inntekter til anna enn vedlikehald og drifta av huset.

Det skal førast møtebok for styremøte. Møteboka skal underskrivast av dei styremedlemmene som er til stades.

Underskrifta til leiaren, eller i hans fråvær underskrifta til nestleiaren, er bindande for laget.

Vikedal Bygdahus har ikkje dagleg leiar.

## **§12 Forretningsfører, vaktmeister og anna arbeidshjelp**

Styret kan tilsette forretningsfører, vaktmeister og anna arbeidshjelp etter at Årsmøtet har gjort vedtak om at det blir oppretta slike stillingar.

Styret leiar og har tilsyn med arbeidet til forretningsføraren og vaktmeisteren. Dei tilsette skal rette seg etter påbod som styret eller leiaren gjev.

Vaktmeisteren er også underlagt forretningsføraren si arbeidsleiing og må retta seg etter dei påbod forretningsfører og /eller styret og leiaren gjev.

For stilling gjeld instruks utarbeidd av styret og godkjent av Årsmøtet.



### **§13 Rekneskap og budsjett**

Styret skal syta for at det vert ført tilfredsstillande rekneskap. Rekneskapen følgjer kalenderåret og vert gjort opp og avslutta pr 31.desember.

Årsrekneskap og status med underskrifter av styret og revisorar og framlegg til budsjett for kommande år skal sendast til medlemene i Årsmøtet saman med innkalling til årsmøtet.

### **§14 Disponering av overskot**

Samvirket sitt overskot skal brukast til samvirket sitt føremål, hermed også det idrettslege. Avkastninga skal bli verande i samvirket.

### **§15 Revisjon og kontrollnemnd**

Årsmøtet i samvirket skal velja ein eller fleire revisorar med nødvendig fagkunnskap.

Revisjonen skal utførast etter dei instruksar som samvirket fastset.

Dersom samvirket har tilsett revisor, vel Årsmøtet ei kontrollnemnd på tre medlemmer som gjennomgår revisjonsmerknader og styreprotokoll og gjev si tilråding til årsmøte.

### **§16 Endring av vedtektene**

Endringar av vedtektene kan gjerast på Årsmøtet i samvirket og krev minst 2/3 fleirtal av dei røystene som er gjevne.

Framlegg til endring av vedtektene må være komne til styret seinast ein måned før samvirket har årsmøte.

Eventuelle vedtektsendringar skal straks sendast til Kulturdepartementet og Brønnøysund registeret.

### **§17 Oppløysning**

Vedtak om oppløysing av samvirket eller overdraging av eiga kan berre gjerast på Årsmøtet i samvirket der alle andelseigarane er innkalla.

Dersom oppløysing eller overdraging av eiga skal kunne vedtakast, må minst 2/3 av stemmene vera representerte og minst 2/3 av dei avgjevne stemmene vera for framlegget.

Dersom ikkje 2/3 av stemmene er representert på møtet, kan oppløysing eller overdraging av eiga likevel vedtakast dersom 2/3 av dei frammøtte på eit nytt møte, der alle andelseigarane er innkalla med minst ein månads varsel, røystar for framlegget, og då utan omsyn til talet på representerte røyster.

Nettoformuen ved oppløysing skal delast på medlemmene i høve omsetting med føretaket.

Dersom det er restformue skal denne gå til samvirkeformål eller allmennyttige formål.

### **§18 Samvirkelova**

Vikedal Bygdahus SA omfattast av lov 29. juni 2007 nr. 81 om samvirkeforetak. Lova gjeld fullt ut med mindre noko er lovleg fråveke i desse vedtektene.